

Ina uniun da Laax ha festivau siu 40avel

Il Club da tennis Larnags exista dapi 1976

■ (anr/abc) **Ils 2 d'uoost 1976 han entgins giugadurs da tennis da Laax concludiu da fundar in'uniun. Ils 16 d'october da quei onn eis ei stau schi lunsch: Quei gi han els clamau ad ina radunonza e fundau il Club da tennis Larnags. 59 giugadurs ein daventai commembers. Sonda vargada ha l'uniun festivau il giubileum.** Ils 27 da zercladur ha il pli impurtont turnier da tennis dil mund entschiet. Tochen ils 10 da fenadur dat l'elita dil mund el stadiun renomau a Londra. Federer, Djokovic, Murray, Ferrer, las soras Williams, Hingis... aschia senumnan ils stars ch'ei el center digl interess. Dus gis avon Wimbledon 2016 ha in dils nundumbreivels clubs da tennis ch'ei dat sil mund festivau a Laax siu 40avel anniversari. Il Club da tennis Larnags s'auda tier las 13 uniuns dil vitg da Laax. Cun ses 90 commembers activs e passivs eis ei aunc oz ina pulita uniun sportiva. Il special da quell'uniun ei ch'ella secumpona ton dad indigens sco hosps da vacanzas. Iniziant dil club ei il dentist Luis Maissen staus. Quel vala sco piunier ed emprem investur turistic da Laax. Els onns sissonta havevan el e ses fargliuns entschiet a cumprar suloms a Staderas e Murschetg. Igl ei stau l'entschatta d'in activissem cun baghegiar casas da vacanzas ed hotels. Tennis fuva lu sin via da daventar in sport popular ed ins leva dar caschun als hosps da dar tennis ellas vacan-

zas. Aschia s'udeva di planisar tier minga project d'hotel silmeins dus ni dapli plazs da tennis.

Ils hotels purschevan jamnas da tennis che fuvan occupadas fetg bein. All'entschatta dil svilup turistic a Laax s'udeva tennis tier l'impurtonta purschida dalla stad. Era ils indigens levand dar tennis. Els ed ils proprietaris d'habitaziuns e casas da vacanzas a Murschetg e contuorn savevan denton buca nezegiar ils plazs dils hotels, lezs fuvan reservai pils hosps. Perquei ha Luis Maissen, ensemen cun *Richard Beeli, Rita Clavadetscher,*

Meini Albin, Hans Veraguth, Judith Beeli ed J. J. Clavadetscher priu l'iniziativa da fundar in club da tennis public. Ils emprems discuors surlunder han giu liug igl unviern 1975/1976, ha igl anteriur president *Max Würth* raquintau sonda vargada a caschun dalla radunonza giubilara. Finamira fuva ei stau da baghegiar dus plazs da sablun sut la Tegia Larnags sper igl ual da Val Buglina e da promover il sport da tennis per in e scadin. Quei ei lu era gartegiau damai che Luis Maissen sco proprietari dil sulom haveva tut interess da baghegiar ils plazs.



Il president dil Club da tennis Larnags Aldo Beeli cul vicepresidente Ruedi Locher, Judith Beeli, confundatura avon 40 onns, e Max Würth, cronist e president da 1983–1992 (da dretg a seniester).

Sonda vargada ha la suprastonza actuala cul president *Aldo Beeli* envidau ils 90 commembers ad ina fiasta giubilara. En tut ein 60 commembers s'annunziai, quei muossa ch'ina gronda part ei colli giada stretgamein cul TC Larnags. Biars onns fuvi la Tegia Larnags la casa dil club da tennis, leu s'entupav'ins per star da cumpignia suenter ils giugs ni per festivar. En sia cronica ha Max Würth raquintau ch'il club dumbravi avon 35 onns circa 20 junioras e juniors. Oz seigien las relaziuns semidadas, il sport da tennis ha retschiert concurrenza d'autras activitads da stad. Dapi igl onn 2001 ei il club proprietari dalla parcella culs dus plazs. Leu, en quei liug idillic sur Murschetg, denter igl ual da Val Buglina e la Tegia Larnags, s'entaupan ils commembers aunc adina per dar tennis. Il plaz ei buc occupaus pli aschi stedi sco antruras. Tgi che ha denton plascher da dar sa guder la recreaziun ch'il sport da tennis porscha. Dalla 40avla radunonza generala ha era il president communal da Laax, *Franz Gschwend*, priu part. El ha vuliu render honor ad ina uniun ch'el ha titulau sco «exemplarica». «Tier vus funcziuna la collaboraziun denter proprietaris d'habitaziuns ed indigens specialmein bein. Nos cussegladers turistics cantunals duessen prender in cuors tiel TC Larnags», ha il president communal manegiau.